

Ngera me a invasive species a ngerchelir a rokui el chad?

By: **Sinchiro Nabeyama**

6th Grade

Koror Elementary School



1st

Ngera me a invasive species a ngerchelir a rokui el chad?

Ngak a kmal oumera el kmo, aika el invasive species a mera el ngerchelir a rokui el chad. Aika a bek el bedengel a dellomel me a charm er a beluu me a daob. A lak el kid el rokui a dmak e kaingeseu el oureor e ng diak el sebechel a chimo me a chimo el chad me a lechub e ng chelechad el metebechel. A lak domekerreu e de kerkikl e ng kmal diak dolchesuar e aika el bek el bedengel a invasive species a otitechid er a beluad, me a lechub e ng mekoad a betok el ungil el dellomel me a charm er a beluu me a daob. A ker a kmo, kau me a ngak kede medengei el kmo, ng ngercheled? Alii aika el invasive species a omekodall el dellomel me a charm!

Se el doraer a compact road e domes er a cheremelel a Babeldaob e a kebeas a melkesako e melemiakl e omtar er a ngii di el kerrekar er a Babeldaob. Ng oumellemau e mekereker el dellomel er a cheremelel a Babeldaob. Ng kmal mekngit a renguk se el kumes a lius me a lemuut el bebil er a dellomel el kall me a kar el kid a ousbech, el mocha mekekedeb a terrir er ngika el kebeas e diak a mo ngosuterir. Ng ngar er ngii a bebil er a beluu er a Babeldaob el oltobed er a rechad el mo melemotem a kebeas. Ng kmal ungil e ng di tirka a udeudel e melemotem me se el bolak a udoud e te ku mo diak lolemotem a kebeas. Alii ng kmal ngerchelek e ngerchelem e ngercheled el rokui ng diak el udoud a mo oderchid el mo meruul er a ngarcheled. Ng ngera me ng kmal ngercheled el rokui? Ak mla subii er a skuul el kmo, a irechar e a rubak a kmal ngar er ngii a taem e ng mo er aike el bek el chetemel me ng melemotem e melalem a lius, buuch, me a lemuut el bebil er a dellomel el kall me a kar, osisiu el taem e ng melobeche a kebeas. A kebeas a mla er ngii e ng di diak mues el ua chelecha el taem. Ng dimlak a osisechakl me a omesuub el ua chelecha el taem, e ng di a rechad er a irechar a mle medengei el kmo, ng ngercheled a ta me a ta el kerekikl e omekerreu e mengeluoluer a lukel a klengar a lemetemall e ng diak el sebechir el mo mepii me a lechub e te mecherar a techil el mo uai ngii.

Ng ngar er ngii a chimo el kekerei el iungs el domekedong er ngii el kmo, Ediaur. Tia di chimo el beluu er Belau el ngar er ngii a Monkii er ngii. A rechad el rokui a mle semeriar er tirka el Monkii. Te mle betok a rechad el omdikl a cheremir, me a rebebil a kuk melai el mei olterau. Ng dimlak a chad er a Ngeaur el mo melchesuar el kmo, a ta er a klebesei e tirkang a mo merreder er a beluu er a Ngeaur. Chelecha el taem e tirka di merael el meritm aike el sorir el rodech e mengang. Se el bo er a sers e te meliit er se el sorir el dellomel ng diak lomekerreu el kmo, aika ng dellemelel techang. A ngar er a mong e se el bo er a chelsel a oreomel e ng bek el bedengel a ngerel a charm el meklou el mo lemuut er a mekekerei el morrenge a ngerel. E ng di chelecha el taem e se el obo er a chelsel a chereomel e ng mla mo diak a betok el ngerel a charm el mrenges. Ke di orrenge a ngerel a Monkii. Aika el mongkii a kot el soal el melim a ngii di el ngisel a charm. Elechang e a ker a kmo, me kede mekerang aika el Mongkii, e mera el ngerchelel techang? Ngak a kmal oumera el kmo, ng diak el di el ngerchelir a rechad er a Ngeaur, ng kmal ngercheled el rokui el chad er Belau. A dekaingeseu e ng kmal mo beot e kebekakl a ureor, e klungiolel Belau er a klukuk.

A rechad er a Olebiil er a Kelulau a mla er ngii a llach el lultebedii el kirel a ngeiul a Talapia el ngikel er a Huriping el mei er a Belau e kede omekeroul. A remilsuub er tiang a mlo medengei el kmo, aika a dirrek el bebil er a bedengel a invasive species el ngikel. Tia el llach a mlad me ng dimlak el bo el telkoi. Aikaikid a bebil er a olchotel a kmo, ng mera el ngerchelir a rokui el chad er a Belau el kerekikl e omekerreu el kirel aika el invasive species er a beluu me a daob, me ng diak el lluat el mo betok er a beluad. E mo ngerchelel a ta ma ta el chad el mo medengei aika el invasive species el ngar er ngii er a beluu me a daob er chelecha el taem me ng mo sebeched el deues e kede medengei el kmo, ng ngera

kede rullii e ng mad aika el invasive species. A kuureng el kmo, ulekum e a rechad er chelecha el taem a mo er ngii a rengir el ua rechad er a ngar er a mong el di tir el medengei el kmo, a lukel a klengar a de terkeklii e ng diak deluut el mo mesang a klungiolel. Ng kmal kired el mo medengei el kmo, aika el invasive species a ngercheled el rokui me ng diak di bo el udoud a mo oderchid el mo mengetmokl aika el invasive species. Alii aika omekodall el dellomel me acharm er a beluu me a daob! A bo dekerkikl e dekaierengas e domekerreu er a lukel a klengar er kid, e ng diak a di chimong er aika el invasive species el sebechel el mekoad a keled me a kurud er a chesel a cheremelel a Babeldaob me a Belau el rokir. E dirrek el diak el sebechir el otitechid er a beluad. Alii, ng kmal ngerchelek e ngerchelem e ngercheled el rokui el chad er a Belau el mo medengei aika el invasive species, e kerkikl el omekerreu me ng diak el temelii a beluad le tia el beluad a di chimong e merael chisel el beluu er a beluulechad.